

Durante Arte di Palabra 2017

A duna reconocemento na Ramon Todd Dandaré, Mag. Ling. pa su dedicacion na nos idioma Papiamento

ORANJESTAD – Durante un anochi exitoso di e competencia di Arte di Palabra 2017 na Cas di Cultura, un anochi di declamacion y contamento di storia di nos hobennan, Comision Arte di Palabra Aruba, a duna reconocemento na dos persona cu a y ta contribui grandemente na nos idioma Papiamento.

Un baluarte, pa loke ta trata e lengahe Papiamento, sigur ta Ramon Todd Dandaré. E conocido linguista aki, naci na Colombia na 1942, a namora di e isla Aruba na 1952, ora pa prome biaha el a pone pia riba dje.

Su encanto cu e palabra, su zonido y e fonetica, a cristalisa na momento cu e hoben a logra termina su estudio di M.O. Spaans exitosamente, na Universidad di Amsterdam y na momento cu el a regresa cu e diploma den su maleta el a cuminsa duna les na Colegio Arubano y den su tempo liber e tabata



duna L.O. Spaans na interesadonan.

Inkierto y cu deseo di supera, Ramon Todd Dandaré, a studia na Universidad del Valle na Cali y a obtene su grado di Magistrado Linguistico na 1975.

Asina el a inicia su carera na Instituto di Lengua Arubano pa 26 aña. Desde 1985 e talentoso linguista a forma parti di miembro activo di Instituto Linguistico Antiano.

Su lucha pa reconocemento di Papiamento como lenga nacional a inicia desde 1967,

no solamente pa Aruba cu a converti su mes den un Isla riba su mes, pero tambe pa e islanan Curaçao y Bonaire.

Continuamente y incansablemente e baluarte aki a participa na diferente charla y conferencia y a publica un

estudio tocante e lengahe mistico y peculiar Papiamento. Como característica di e baluarte aki sigur ta su don pa traspasa su conocimiento y percura pa e idioma keda vital, bibo y consecuente.

Asina el a sa di dirigi cursonan di Papiamento di tres y di dos grado na Instituto Pedagógico Arubano y ta docente di Fonología y Gramática. Tambe e tabata un di e docentenan cu a duna e curso di Corector di Papiamento na un grupo di empleado publico.

E linguista Ramon Todd Dandaré, a skirbi: "Historia di Diccionario y lista di palabra na Papiamento di 1829 pa 2014. Un trabou di investigacion profundo y bon documenta cu e linguista Ramon Todd Dandaré a realisa.

Aruba ta orguyoso di e baluarte aki, un reconocemento sigur na su luga. Pabien Ramon Todd Dandaré y pabien Aruba.